

四庫全書

史部

欽定四庫全書

史部

皇朝文獻通考卷十二

內閣中書臣實汝翼履勘

總校官中書臣孫溶

欽定四庫全書

皇朝文獻通考卷十

田賦考

十

屯田

順治元年定荒地屯種例先是開國之初每佐領撥壯丁十名牛四頭於曠土屯田至是准州縣衛所荒地無主者分給流民及官兵屯種

二年差御史一員巡視屯田

三年更定屯田官制每衛設守備一員兼管屯田
量設千總百總分理衛事其原設指揮副指揮等
俱裁去改衛軍為屯丁凡衛所錢糧職掌及漕運
造船事務并都司行都司分轄皆仍舊

四年裁屯田御史令各巡按兼管屯衛事宜

五年以雲鎮屯田荒蕪令軍民墾種官給牛具量
收租銀

六年定直隸屯地輸租例天津葛沽等處屯地舊

例分三則上地每畝六升中地四升五合下地三升今定各樹菜畦水田葦地每畝科租一斗麥地六升雜糧地四升五合

七年令衛所屯田分有無運糧科徵先是衛所屯田分給軍丁承種因有操演城守捕盜領運之責科徵較民地稍輕至是裁汰衛軍凡有運糧衛所屯糧仍舊派徵其無運糧衛所屯田俱照州縣民田例一體起科

九年以廣東屯糧全徵本色屯丁苦累令本折各半徵收又令各省屯丁有關漕務者仍留駕運十年裁巡按御史令各省巡撫督理屯田

定江南秣陵廣武英武三衛屯糧准其折銀

十三年令河南等省各屯衛照民地例徵糧自開屯以來屯租數倍民糧屯丁輸納維艱故有是令定屯丁貼運之例浙江金鄉等衛有屯無運杭寧溫台各衛嘉湖嚴衢各所有屯帶運金華等所處

紹等衛無屯有運應均算津貼向例漕船一艘派
屯田一百五十一畝有奇今議定帶運衛所照數
分派餘田徵租銀撥貼無屯衛所至有屯無運衛
所若有願運者照例給田僉運若無領運者計由
徵租銀撥貼無屯衛所運丁至康熙十年以屯田
缺額定每船給田一百一十三畝

又以廣西衛所久廢今州縣招墾荒屯無力者官
給牛具

十四年清查湖廣軍民冊籍先是湖廣有運軍班
軍操軍三項各設屯田後因操軍班軍不用令其
歸農止留運軍協濟江西漕務但軍民冊籍不分
賦役易於紊亂嗣後民冊當差者衛所不得扳告
軍冊有役者州縣不得重派民佃軍田者照例納
租毋得再派軍役軍佃民田者止完正賦毋得派
及民役

十五年以雲鎮屯衛錢糧歸山西驛糧道管理

十六年裁四川衛所其屯糧歸併州縣照民田起
科

十八年更定雲南職田納糧例先是雲南衛弁職
田收租准俸不納稅糧嗣後各歸衛所編入戶口
俱以本七折三徵收其舊係每畝一斗九升至三
斗者照軍糧例起科三斗至五斗者概以三斗為
額

康熙二年以江南屯糧仍歸都司管轄工科給事

中于可托言江南屯糧改歸驛傳道兼攝不便宜
仍令都司總理俾衛弁有所畏忌屯丁易于輸將
部議如所請行之

五年以陝西衛所屯糧與民糧一體輸納無僉運
領運之事不必改歸都司仍令布政司總理

六年議令投誠兵屯田湖廣道御史蕭震疏言屯
田為養兵裕國之本兵屯縱不可即行而投誠開
荒之策未有不可立行者查投誠之衆所攜家口

數倍正兵若予以荒地給以牛種俾無失所以為
招徠之勸一便也綠旂兵有防禦之任投誠兵無
汎地之責是綠旂之屯田難投誠之屯田易二便
也近例投誠兵隨標者月給餉糧歲費金錢八十
餘萬與其糜費養兵之資何如使開荒蕪之地行
之三年照田起科既有兵餉又增屯賦三便也各
省荒田尚有四百餘萬頃分給投誠兵丁使之耕
種則軍儲日實戶口漸繁是力田即以阜生四便

也疏入令兵部戶部行令各省督撫確查墾荒事
宜遵行

令黔蜀兩省屯田御史蕭震又言國用不敷之故
皆由於養兵以歲費言之雜項居其二兵餉居其
八以兵餉言之駐防之禁兵藩兵居其二綠旂兵
又居其八今黔蜀兩省地多人少誠行屯田之制
駐一郡之兵即耕其郡之地駐一縣之兵即耕其
縣之地駐一鄉之兵即耕其鄉之地如此則養兵

之費既省而荒田亦可漸闢矣下部議行

是年令廣東雲南屯田道稽察衛所各官及徵收屯糧

又以江南石城等衛屯糧改折太重仍令徵本色
十年減廣東屯糧額廣東屯糧十倍民賦荒蕪者
多令照民田重則每畝八升八合起科

十五年嚴荒田影射之禁各衛所荒田坐落州縣
境內縣查則指為軍地衛查又詭為民地令督撫

嚴徵州縣衛所各官逐一查報不得推諉以滋影射

十八年令江南屯田道考成視都司例

二十三年湖廣偏橋鎮遠二衛地畝錢糧歸併貴州徵收嗣後湖南屯糧則例屢多更定至二十五年以銅鼓衛屯糧歸併新寧縣徵收三十六年辰州衛屯糧歸併瀘溪縣照民田科則徵收又城步縣有經徵靖州衛屯糧改歸靖州綏寧縣徵收四

十年以沅州龍陽黔陽靖州四州縣屯田科則偏重將賦役全書譌刊之數改正減免四十五年以清浪平溪二衛屯糧徵米輸運維艱准其徵銀二十六年裁雲南都司

三十年定廣東衛所屯糧減則徵收照民田例三十四年

諭雲南屯田錢糧較民田額重數倍民人苦累嗣後屯田賦額著照河陽縣民田上則徵收明年議雲南屯地錢

糧亦照屯田則例

五十七年減湖北沔陽衛屯田糧額沔陽衛屯田
五百七十二頃八十畝有零向係水淹窪地今照
湖南清浪衛減則之例每畝五升四合五勺

雍正二年臣僚上言請改併衛所歸州縣管轄兵
部議軍民戶役不同歸併未便

上曰滇蜀兩省曾經裁併未聞不便今除邊衛無州縣可
歸與漕運之衛所民軍各有徭役仍舊分隸外其餘內

地所有衛所悉令歸併州縣令直省督撫分別區畫具
奏

是年裁山西都司明年復裁江南浙江江西湖廣
山東廣東等省都司又裁浙江杭州等衛徵屯千
總其衛所錢糧歸併布政司管轄

臣等謹按衛所之制創自前明其始也以軍隸衛
以屯養軍而設都司以統轄之蓋倣唐府兵遺意
至總兵副總兵叅遊守把以下有事則設無事則

罷未嘗以為經制也未幾衛所之制日弛別募民以鎮守於是營軍與屯軍分而為二屯軍惟有漕運之職其無漕運者又有番上營造之役軍政廢而屯戶亦病矣

國初仍明之舊衛所屯田給軍分佃一切雜徭皆從革除後因直省各設經制官兵而屯衛之軍次第裁汰至是定制惟有漕運之地仍隸衛所其餘多歸併於州縣蓋論其籍雖有軍民之殊而承佃輸

賦則屯戶與民無異隸之州縣於體制為合且衛
所官弁類皆武夫其撫恤屯軍必不能如牧民之
吏而文武各相統轄詞訟交涉兼多袒護掣肘之
弊此衛所改隸州縣為因時從宜之良法也

是年總計直省屯田三十九萬四千五百二十七
頃九十九畝九分七釐屯賦銀四十三萬六千四
百四十六兩四錢一分五釐九毫屯糧一百六萬
四千五百九十二石三斗五升一合九勺草四百

金匱要略卷十
八十七萬一千三百四十五束有奇

直隸等處屯田七萬四千四百九十九頃二十八畝一分二釐有奇屯田銀四萬三千三百六十六兩八錢二分八釐九毫有奇屯糧八萬四千七百三十四石一斗三升九合四勺有奇

江南江蘇等處屯田一萬一千五百九十七頃七十二畝六分二釐有奇屯賦銀三萬八千四百一十二兩三錢七分有奇屯糧二萬三千四百八十

八石有奇

安徽新安等處屯田一萬一千八百五十五頃五
十九畝五分有奇屯賦銀四萬五百六兩有奇屯
糧米麥四千四百八十二石有奇

山西太原等處屯田六萬四千七百三十六頃十
九畝有奇屯賦銀五萬二千三百二十五兩四錢
有奇屯糧五萬七千五百四十九石有奇草八萬
三千四百三十二束有奇

山東濟南等處屯田二萬四千四百二十七頃五畝有奇屯賦銀四萬九千六百七十九兩八錢三分有奇

陝西西安潼關等處屯田都司更名額外地共四萬八千四十八頃三畝屯賦銀三萬六千一百一兩四錢九分屯糧十九萬五千二百三十六石五斗七升

鞏昌甘州等處屯田九萬九千八百九十四頃六

十五畝有奇屯賦銀一萬九千九百七十四兩六錢三分有奇屯糧四十七萬六千四百九石四斗有奇草四百七十八萬四百五十三束

浙江杭州等處屯田一千七百七十三頃八十畝六分有奇屯賦銀一萬八千六百三十兩一錢一分有奇

江西南昌等處屯田六千八百二十八頃八十畝八分有奇屯賦銀一萬三千三十一兩四錢七釐

有奇

湖北武昌等處屯田一萬八千二百一十二頃二十八畝三分有奇屯賦銀四萬八千九百二十一兩三錢九分有奇

湖南岳州等處屯田七千二百四十一頃六十七畝一分四釐有奇屯賦銀二萬三千七百五十三兩一錢六分有奇

四川建昌等處屯田五百七十三頃三十二畝五

分有奇屯賦銀一千四百五十兩六錢有奇屯糧
米豆蕎八千九百八十六石一斗六升有奇

福建福州等處屯田七千七百七頃八十六畝有
奇屯賦銀三萬八千二百一十九兩有奇屯糧二
萬六千三百八十八石有奇

廣東廣州等處屯田四千九百四十八頃九十畝
七分二釐有奇屯糧八萬八千九百九十七石二
斗五升七合二勺有奇

廣西桂林等處屯田一千九百九頃五十六畝有奇屯賦銀八千二百二十四兩八錢五分有奇屯糧九百七十五石有奇

雲南平彝等處屯田八千六十一頃二十九畝二分有奇屯賦銀一千一百九兩二錢二分有奇屯糧五萬五千四百七十八石有奇

貴州貴陽等處屯田二千二百一十一頃九十六畝四分有奇又陸地一百八十九分有奇屯賦銀

二千七百四十兩一錢三分有奇屯糧三萬九千
六十六石四斗九升四合舊折米六百三十四石
七斗九升五合有奇穀折米六百八石六斗五升
有奇

三年令安西兵丁試行屯墾安西屯墾未備兵丁
家口乏食令將駐防兵之不願久住者召募頂換
擇水土宜苗稼之處給之使之屯墾俟資糧漸裕
之後搬取家口永遠駐防又以初次應募之兵未

習農事就沿邊州縣僱農人為幫夫每兵三名給幫夫一名每歲耕獲令幫夫指引俟屯墾既闢將幫夫裁去

五年令軍田照民田給契上稅時以黔省所有軍田每畝上稅五錢報司給契許照民田一體賣買所收稅銀年底造冊送部查核并通行直省悉照此例

又准江南之建德東流二縣向有額解南撫饒三

衛所屯糧編入江南池州府經管

九年定屯衛田准典與軍戶不得私典與民違者將田歸衛典價入官仍照例治罪

十二年設甘肅柳林湖等處屯田甘肅涼州府鎮番縣之柳林湖散處邊外地多荒蕪總督劉於義奏請招民開墾從之

乾隆元年

諭廣東有屯田羨餘一項原係衛所官弁徵收每徵糧

一石收穀三四石不等除正米撥支兵餉外餘穀悉
侵蝕入已嗣該督撫察出題報留備賑糶之用但屯
田糧額本重於民田今以一石之糧徵收至三四石
屯民其何以堪又聞各省軍田額糧較之民地亦重
從前軍田畝數原多嗣經漸次清釐田主亦屢更易
而糧米仍輸舊額自屬苦累可傳諭各督撫詳加察
核將如何定額徵收並革除額外加徵之處密議請
旨兩廣總督鄂彌達議廣東屯田五千一百十三項

六十五畝零額徵屯糧九萬五百十七石有奇緣
屯田給軍耕贍軍有逃亡故絕歸官召佃納租完
糧之外不無贏餘是為曠軍餘羨又屯丁有遠隔
衛所者差役收穀運回碾放兵米不無多收是為
屯糧餘羨雍正六年以後次第查出歸公今議曠
軍餘羨銀米仍舊歸公外其原報徵收之屯糧羨
餘應遵

旨盡行革除仍照民米之例聽屯民自行赴倉完納有

多收者罪之至通省屯糧科則自一斗至五斗不
等其拋荒墾復者每畝徵八升八合八勺有奇從
前屯丁完賦之外尚多雜徭自裁撤衛所以來與
民戶一例並無差使茲復革除額外餘羨較之當
日減至二三倍若再行裁減則兵米無項可補請
照舊定科則征輸戶部議如所請行之其餘各督
撫議奏次第豁免至乾隆十一年合計歲減銀一
萬二千兩有奇

又

諭浙省屯糧向來每石徵銀一兩康熙年間特恩減免
改徵銀五錢五釐計算每畝徵銀八分有零惟嚴州
一所遺漏未經減免每畝仍徵銀二錢一分五釐查
杭州前右二衛屯田與嚴所相距咫尺每畝止徵銀
一錢二分八釐零著將嚴所屯糧照杭州前右二衛
科則徵收以紓軍力永著為例

又

諭粵西軍屯田畝惟武緣一縣糧額較之下則民田每畝多銀二錢二分未免過重著將舊額酌減每畝定以一錢徵收永著為例

二年

諭浙江温州衛屯田三百一十二頃每畝徵銀一錢七分零台州衛屯田二百二十頃每畝徵銀一錢四分零比本地民田較重著照杭州前右二衛科則畫一徵收永著為例

停止貴州新設苗疆辦理屯軍之事時貴州苗疆
新定督臣張廣泗議逆苗絕產令自行首舉安設
屯軍其見在苗戶之田有撓入絕產內者歸併屯
內即以絕產不宜安屯之處按數撥還總理王大
臣等議如所請

上諭曰數年以來經理苗疆原期寧輯地方化導頑梗
並非利其一絲一粟是以彼處應輸之正供朕皆仰
體

皇考聖心永行革除豈肯收其田畝以給內地之民人乎
從前屯田之意原因該督等奏係無主之絕產故有
此議今看來此等苗田未盡係無主之絕產經理之
人以為逆苗罪本當誅今既宥其身命即收其田產
亦法所宜然殊不知苗衆自有之業一旦歸官目前
雖惕於兵威勉強遵奉而非出於中心之願安能保
其久遠寧帖耶至於撥換之舉在田地有肥瘠之不
同而畝數又有多寡之各異豈能銖兩悉合饜服其

心使苗衆無絲毫較量之念乎總之頑苗叛逆之罪
本屬重大國家既施寬大之恩待以不死予以安全
而此區區之產業反欲收之於官則輕重失宜非

皇考與朕經理苗疆之意矣料此時張廣泗正在辦理屯
軍之事可將朕旨馳寄令其即行停止其絕產實有
幾何如何布置之處必熟籌萬妥請旨施行後經議
定逆苗絕戶田產查明實數賞給屯兵給以口糧
牛種令其速擇形勝建築堡牆以資捍禦毋得生

事滋擾

又

諭各省屯糧科則輕重不等州縣屯糧有較之民田過
重者有同一屯田而徵糧之本折多寡不同者有同
一科則而額糧之重輕相去懸殊者念此屯民皆吾
赤子若地瘠糧重未免輸納維艱著該撫秉公確核
各就原額糧則之重者酌量裁減具題請旨

令柳林湖等處屯田設立屯長總甲分理柳林湖

等處屯田地方遠濶屯戶衆多酌留熟諳屯務之
生監農民並設立屯長總甲分理所需口糧盤費
於存公銀內動撥

三年以安徽之懷遠衛軍田徵銀視民田較重今
改照蒙城縣民田例又議減武平衛軍田加徵銀
數永著為例懷遠衛軍田十三頃每畝徵銀八分
八釐零又二頃每畝徵銀六分二釐零今照蒙城
例每畝徵銀二分二釐零武平衛軍田每畝加徵

銀七釐三毫今減去五釐五毫

四年招民承種安西鎮口外屯田時以安西鎮屬口外屯田可藉民力墾治以供兵食議召募農民商賈及兵之有餘丁者承種所獲糧穀民得六分官收四分委西安道與通判管理此外餘地聽民報墾納糧

五年禁屯田私租與人者運軍額設屯田止許得當年租銀不得加租及立券預支其已經加租之

田如力能回贖者即退還價值別租不能贖者俟
租滿日別租若指稱加租名色立券私交者將運
丁及租田之人依私典軍田例治罪其田另給新
丁仍追租價入官

六年令各省屯田定限一年無論在軍在民一併
清出歸軍贍運

八年清釐湖廣軍屯田湖南軍屯田地典賣與民
旨令悉行清釐量為區別如民買軍田願應差者

俱仍舊管業不准取贖若民買軍田不願應差及
軍買軍田田去差存者令原丁取贖如力不能贖
則令典買者每歲助費以濟漕運又湖北衛所屯
田各令清出原額除納賦之外酌量多寡分別助
費官徵官給均分各船濟運其故絕逃亡之戶民
人項種者見在納糧貼運與屯丁無異若此項田
有出售者仍令軍戶歸買

十二年定民買軍田取贖之例各衛屯田典賣與

民者許備價取贖由衛所移文州縣飭令民人領價退田若以民田捏報軍田希圖混冒者將衛所官處分

准口外八溝塔子溝等處設兵屯田從直隸提督拉布敦議也

十八年總計各省屯田二十五萬九千四百十有六頃四十八畝屯田銀五十萬三千五百五十七兩屯糧三百七十三石各有奇

江南江蘇屯田一萬一千五百九十六頃九十二畝賦銀三萬七千三十五兩各有奇

安徽屯田一萬一千八百五十六頃八十六畝賦銀四萬五千八百六十兩糧三百七十三石各有奇

山西屯田九千九百三十頃賦銀五萬九千百二十一兩各有奇

山東屯田二萬二千頃八十四畝賦銀五萬六千

十八兩各有奇

河南屯田七千二百五十二頃九十八畝賦銀一萬七千九百九十一兩各有奇

陝西西安屯田三萬九千二百三十六頃三十八畝賦銀七萬四百二十六兩各有奇

甘肅屯田十萬七千二百四頃七十八畝賦銀二萬八千五百七十五兩各有奇

浙江屯田一千七百四十一頃六十四畝賦銀一

萬七千八百九十七兩各有奇

江西屯田六千四百三十五頃六十六畝賦銀一萬四千九百三兩各有奇

湖廣湖北屯田二萬四百十有六頃二十三畝賦銀五萬二千七百兩各有奇

湖南屯田五百十有一頃十有八畝賦銀三千二百四十八兩各有奇

四川屯田一百三十四頃八十二畝賦銀一百兩

各有奇

福建屯田七千八百四十五頃三十一畝賦銀四萬四千三百十六兩各有奇

廣西屯田一千九百九十六頃六十二畝賦銀八千五百十有六兩各有奇

雲南屯田五千九百十有五頃三十七畝賦銀四萬四千九百七十四兩各有奇

臣等謹按會典據乾隆十八年奏銷冊開載其歸

併各州縣者不在數內

二十一年募民屯種瓜州地畝先是雍正三年吐魯番回人歸附

諭令遷入內地十年署大將軍查郎阿奏請將吐魯番衆在肅州所屬之王子莊安插奉

諭旨瓜州地土肥饒氣候亦與回民原住地方相似且現在開墾可種之地甚為開濶足資回民耕牧著總督劉於義等將吐魯回回衆安插瓜州築堡造房給與口糧

牛種至是移歸故土總督黃廷桂言瓜州回人遷移魯克察克所遺地畝逐細丈量共計成熟地二萬四百五十畝應就近招民屯種借給籽種於收成後扣除其糧石按官四民六徵收從之

二十二年清查陝西屯地銀糧陝西布政司塔永寧言西安鳳翔同鄒乾等五府州屬屯地往往有地已典賣糧未過割亦有租佃與人錢糧仍係原業主交納其本色糧石例應運交道倉納戶布圖

省事每有包給催糧旂甲代完者雖於乾隆八年立法清查但條款尚欠詳盡歷今十有餘年業戶之展轉典賣者愈多請寬限一年於農隙時徹底清查絕賣之地即令過割於紅冊內更名典當租種之地於原主名下分註佃戶典戶姓名概令種地之戶完糧如有出典回贖亦更易佃戶者亦於紅冊內改註總不許原業主私自收用亦不許旂甲包納代完以杜隱冒下部議行

二十三年清釐江西軍屯田江西巡撫阿思哈言
康熙年間清查屯地將原有地畝悉行查出歸軍
並定以回贖之例今為時既久各屯田與民田相
錯佃人業主保無私相勾串售賣及移坵換段情
弊應委員按照地丁攜帶老冊預期曉諭令將私
相典賣悉行首明仿照直隸回贖旗地之例按畝
查對立法回贖註明現管佃名繪圖造冊分送糧
道俾運丁養贍有資辦公不致賠累下部議行

二十四年准瓜州屯田加墾地畝改屯陞科陝甘
總督楊應琚言瓜州屯戶所借牛具籽種口糧二
十二年以後未能按數交還緣屯種人戶僅給田
三十畝除扣還官項外所餘無幾一遇歉收輒多
逋欠加以定議官四民六分收小民每視為官田
咸懷觀望今據屯戶籲請每戶加墾荒田三十畝
一體改屯陞科每畝額輸小麥四升一合零糧三
升雖與原議四六分收不無少減然加墾地畝自

必歲獲寬裕且改屯陞科小民視為世業更必踴躍報墾於

國計民生交有裨益軍機大臣議如所請行

二十七年改柳林湖屯田照鎮番縣中下則陞科甘肅布政使吳紹詩言涼州府屬鎮番縣之柳林湖屯田原墾一千九百八十餘頃續墾三百七十五頃歲給籽種口食所收糧石官四民六二十三四年以來分收糧石漸次減少緣民情視為官田

不甚勤種且屯民二千四百餘戶散處一百六十餘里地方官耳目難周殊鮮實效應請遵照瓜州之例改屯陞科照該縣民地上中下則納賦至是陝甘總督楊應琚言柳林湖屯田改屯為民按鎮邑上中下則陞科緣該處並無水泉可以灌溉鎮邑渠流又難以旁及邊外本無水田上則地畝請將初墾地照中則民田續墾地照下則民田陞科皆下部議行

二十八年准柳溝布隆吉爾等處屯戶加墾餘地
改屯陞科楊應琚言安西府屬淵泉縣之柳溝布
隆吉爾等處地畝乾隆四年招民屯墾現住屯民
二百四十戶種地七千二十五畝核計每戶實止
種地三十畝現在生齒漸繁每歲所收糧石不敷
養贍請於原種屯田之外畦頭畛尾計共有可墾
餘地八千餘畝聽其加墾以原分屯田之水導引
灌溉並照瓜州之例改屯陞科俾農民視為世守

之業自必盡心耕耨下部議行

准靖逆赤金等處屯田一體加墾餘地改屯陞科
楊應琚言安西府玉門縣靖逆赤金等處屯地乾隆四年同淵泉縣柳溝布隆吉爾等處地畝一併招民屯種查該處原招屯民二百三十餘戶承種地八千八百餘畝核計每戶種地無多現在生齒日繁不敷養贍其情形與柳溝布隆吉爾等處並無二致應照柳溝布隆吉爾之例加墾餘地改屯

陞科下部議行

三十一年總計各省屯田三十九萬二千七百九十五頃六十七畝有奇屯賦銀七十八萬四千九百二兩屯糧百九萬七千六十四石各有奇草五百五萬六百二十束

江南江蘇屯田一萬四千四百二十一頃二十四畝有奇屯賦銀三萬五千六百五十五兩屯糧五萬六千七百二十七石各有奇

安徽屯田四萬二千二百十一頃九十畝有奇屯
賦銀十萬九千九百三十三兩屯糧九萬九千九
百十七石各有奇

山西屯田九千九百九十九頃三十畝有奇屯賦
銀五萬九千一百二十一兩有奇

河南屯田六萬五千五百二頃七十五畝有奇屯
賦銀二十萬二千八百九十七兩有奇

山東屯田二萬二千九頃五十五畝有奇屯賦銀

五萬六百十一兩有奇

陝西屯田四萬七十二頃七十畝有奇屯賦銀一萬三千一百七十七兩屯糧十有五萬六千六百七十八石各有奇草九千五百三十二束

甘肅屯田十有一萬四千五百九十七頃六十畝有奇屯賦銀三萬七千五百二十一兩屯糧五十萬二千六十九石各有奇草五百四萬一千八十束

浙江屯田一千七百三十九頃十三畝有奇屯賦銀一萬七千九百十三兩有奇

江西屯田六千四百三十五頃六十六畝有奇屯賦銀一萬四千九百三兩有奇

湖北屯田二萬四百七十三頃三十八畝有奇屯賦銀五萬八千七百六十三兩屯糧九萬三千一百六十三石各有奇

湖南屯田三萬八百八十一頃四十八畝有奇屯

賦銀九萬八千六百八十九兩有奇

福建屯田七千八百八十六頃四十五畝有奇屯
賦銀四萬四千四百二十三兩屯糧二萬五千二
百八十一石各有奇

廣東屯田五千二百七十九頃五十七畝有奇屯
賦銀一千八百七十七兩屯糧九萬二千七百三
十九石各有奇

廣西屯田一千九百九十六頃六十二畝有奇屯

賦銀八千五百十六兩有奇

雲南屯田九千一百七十三頃五十一畝有奇屯
賦銀三萬六千七百九十六兩屯糧七萬一千四
百八十六石各有奇

三十六年戶部議高晉奏江西袁州贛州饒州建
昌各衛所丈缺及水冲沙壓屯田地共六十四頃
九十六畝零應徵屯糧准自三十五年為始照數
豁免如議行

三十七年漕運總督嘉謨奏台州衛民佃管種屯田准其酌量分別加租下部議行

三十八年

諭裴宗錫覆奏查辦軍屯一案據稱糧道林文德稟請將上下江無為等州十七州縣向不歸運之裁衛屯田一概加徵津費所辦非是而加徵之名更屬不能深體朕意朕惠愛百姓普蠲恩免不下數千百萬惟期家給人足樂利永臻何獨因清釐屯糧一節欲舉

百餘年相沿之民產一旦忽議加賦朕豈肯為之其間或實係屯產轉售他人而豪猾者貪圖輕賦以逞其侵隱此等官為之經理實所宜然若因此而追究遠年之民產且定以官為加徵之名則斷乎不可此事著交高晉妥協查辦迅速完結毋得稽延時日其江蘇省並著一體照此旨辦理

又

諭今年七月間據陳輝祖奏請將該省民屯新墾丁銀

隨年攤徵一摺批交該部議奏旋經戶部即照陳輝祖所奏覆准並請查行各督撫就本省情形酌籌妥議具奏嗣據直隸等省陸續議奏大約請仍舊制者居多則陳輝祖所奏及該部所議皆未為得當國家承平休養百有餘年間閭閻生齒日繁向來編審人丁按丁科則自康熙五十二年我

皇祖聖祖仁皇帝

特頒恩詔盛世之民永不加賦即以是年丁糧之數作為

定額仰見

皇祖惠愛黎元法良意美寔我萬世子孫臣庶所當遵守
不易者朕臨御以來仰承

天祐

祖德累洽重熙無時不以愛養斯民為念豈肯於丁糧區
區毫末之賦稍存計較乎況人數既多自地無遺利
若求可墾之地則惟新疆烏魯木齊等處尚可招徠
屯墾至於內地即間有東坍西漲其數甚微祇須地

方官查明照例妥辦若以新墾民屯地畝復將丁銀
隨年攤納是與小民較及錙銖尤非惠下恤民之道
所有各省辦理丁糧一事無論已未覆奏俱著悉仍
其舊并將此通諭中外知之

三十九年江蘇巡撫薩載奏江浦縣塌沒省衛屯
田六十四畝二分零至六月奏江寧縣占廢坍沒
屯田二頃七十五畝零均請豁除錢糧下部議行
四十年戶部議覺羅敦福奏湖南省五衛屯田有

別伍頂買田畝者即與同伍無異應編入原船按糧承差如係活契驗明仍聽本軍回贖其有民人頂買之田除年遠造房築墓及軍逃地荒自行開墾者免贖仍照舊貼費當差其餘典賣田畝如本丁願贖概令贖歸未贖時令現業按糧貼費並將原議民戶典賣屯田編入軍籍之例改正停止本軍名下尚有出典未贖之田有力者先贖屯產如無應贖屯產方聽其另置民田另納糧賦毋許撓

入軍田如議行

湖北巡撫陳輝祖奏武昌等衛所清出典賣屯田
請加津贍運部議查典賣屯田與受各戶均應按
例辦理特以典賣者未必盡係現運之丁而執業
者亦恐非起首承買之戶從重加津免其撤田歸
運則私相授受者知所炯戒而仍不致有失業之
苦向後典賣之弊庶可不禁自止應如所奏辦理
從之

四十一年戶部議准勒爾謹奏肅州九家窩屯田
八千八百三十三畝零改歸民田於本年陞科

四十四年成都將軍特成額奏兩金川新收屯糧
准照打箭鑪至西藏一路台站貯糧成例凡存倉
及支放兵糧每石開銷鼠耗五合過撥運別屯每
石開銷盤折一升仍令每年造冊專案報部下部
議行

四十九年戶部議准湖北巡撫姚成烈奏施南府

屬恩施縣民人自首開墾成熟額內中則屯田四十二畝三分有零又額外下則地三十頃二十二畝有零自四十七年起科嗣後應令按年造入地丁奏銷冊內報部查核

五十年湖廣總督特成額等奏稱湖南長沙等府州屬原有弁田六萬六千八百八十餘畝除從前已賣變折共去田三萬七千九百一十餘畝實止田二萬八千九百七十畝零自清查之後幾閱五

十年私相買賣者又不一而足且地方棍徒唆訟圖詐者不少更有輾轉相售具告到官必須層層訊究迨經質明賣主多無力繳價買主又難於安耕徒多擾累若循守舊議殊非盡善應將餘存弁田母論已賣未賣俱照民產准其買賣稅契過戶承糧執業弁田名色悉行除去以杜訟端則小民既常安耕鑿匪徒亦無從滋事於地方殊多裨益下部議行

皇朝文獻通考卷十

欽定四庫全書

皇朝文獻通考卷十一

田賦考 十一

屯田 新疆

臣等謹按平定準夷回部版圖式廓二萬餘里

大功耆定興屯教種次第舉行由巴里坤以至伊犁前
後墾闢無慮十餘萬頃天山南北禹甸昉昉盛哉
非復漢唐以來足軍食省輓輸者所可同日而語

也今臣等編次屯田謹特立新疆一門按年排纂列各省屯田之後以垂示萬世若夫城堡臺站駐防統轄之制已詳見兵考茲不備述云

康熙五十四年設喀爾喀蘇爾圖喀喇烏蘇烏蘭固木科布多等處屯田

命公傅爾丹等監管先是

上以額德爾齊老圖地近推河應屯田駐兵令將軍費揚古等與喀爾喀汗王等會議至是費揚古言臣等

以屯田詢喀爾喀土謝圖汗等據稱蘇爾圖喀喇
烏蘇烏蘭固木科布多等處俱可耕種應撥土默
特兵善種地者一千每旗令台吉塔布囊一人率
往屯種遣大臣一人監管奏入

上命議政大臣等集議議應如所請再哈密地方亦可耕
請一併行文將軍將西吉木布隆吉爾等處勘明
具奏得

旨如議傳爾丹願往効力即交伊辦理後都統穆賽等言

科布多等處耕種收穫甚多應撥土默特人一千
及出兵歸化城之土默特兵一千令往耕種議政
大臣等議如所請得

旨允行

臣等謹按屯田之設不特省輓輸兼可盡地利我

聖祖仁皇帝西事之初即

勅所司留意趙元國三奏至是察勘蘇爾圖等處分兵屯
種

命傅爾丹辦理嗣後復募民田作不數年間嘉峪關外裕
軍儲於絕域化沙磧為沃壤矣

五十五年

命議開巴里坤哈密等處屯田

諭議政大臣等巴里坤烏蘭固木等處種地之事甚屬緊
要若種地得收則諸事俱易著會議具奏尋議開墾田
地現今傅爾丹等率土默特人一千往烏蘭固木
等處耕種發往軍前贖罪人等有願種地者許其

耕種又前者尚書富寧安言哈密所屬博羅爾圖古哩克接壤之處並巴里坤都爾博勒津喀喇烏蘇及西吉木達里圖布隆吉爾附近之上浦下浦等處俱可令人耕種兵丁有願往者亦令耕種富寧安現駐肅州其附近之西吉木等處可令酌量耕種圖古哩克等處令大臣一人管理奏入得

旨如議著副都統蘇爾德前往管理是冬蘇爾德奏言都爾博勒津圖古哩克喀喇烏蘇所種地畝並收穫

聞

議政大臣等議令預備籽糧為明年計從之

五十六年增墾阿里滾固楚等處地傅爾丹言今
歲除耕熟之田已經播種外其阿里滾固楚錫巴
爾鄂希納瑪爾濟呼勒克察罕郭勒等處地土肥
厚現在開渠引水一體增種五月中又遇甘霖沾
足所種青稞大麥小麥各極暢茂奏入報

又

命戶部侍郎梁世勲等督理巴里坤屯田

五十七年議叙屯田官郎中蘇赫等侍郎海壽言
臣與富寧安新舊所墾都爾博勒津圖古哩克及
回子扎薩克敏所種塔里雅沁地所餘青稞悉令
備倉收貯充給軍糧其郎中蘇赫等急公耕種請
約計穀數所入多寡量子議叙議政大臣議如所
請得

旨允行

六十年十月增墾烏蘭固木地征西將軍祁德里
言烏蘭固木地煖土肥請於來年多墾可望大收
議政大臣議如所請得

旨允行

六十一年覈科布多烏蘭固木等處地畝穀數祁
德里言據總理屯糧事蘇爾租呈稱科布多烏蘭
固木特里河諸處可種之地悉乘時和開墾坤都
倫河諸處可種之地亦悉開墾今年種麥所獲數

倍往年來年更可添種得

旨據所奏在科布多烏蘭固木等處開墾耕種因土沃水
裕今年所得麥子收有數倍請明年添種千石等語軍
前種地人員稟報所收糧數應照內地或一畝一晌收
得米石若干方得明晰著議政大臣詳加議奏尋議行
文將軍傅爾丹等將開墾地丈量頃數計算籽種
及秋收糧數詳報從之

雍正三年

命議州鄂爾坤圖拉等處屯田

諭振武將軍穆克登鄂爾坤圖拉一帶甚為寬濶若開墾屯田實為永遠之計爾會同喀爾喀將軍確議具奏尋穆克登奏言鄂爾坤一帶尚有昔人耕種處及故渠灌田蹤跡圖拉等處現有大麥小麥非不可墾之地但霜降早晚不一樹穀宜否不同請於屯長中擇十餘人於明年三月遣往耕種俟秋收後具奏議政大臣議如所請得

旨允行至七年振武將軍順承郡王錫保奏報鄂爾坤濟爾瑪台圖拉三處屯田收穫大麥小麥糜子共七千五百五十石有奇九年奏報一萬六千三十石有奇

十年開墾哈喇該圖地令兵民耕種工部侍郎原署西安巡撫瑪爾泰言哈喇該圖為諸路隘口所會水草亦佳請撤額塞勒津城所駐步兵并發西寧馬步兵合二千人赴哈喇該圖詳閱耕種地方

令兵丁開墾從之

乾隆元年議辦鄂爾坤屯田先是雍正十三年定邊大將軍慶復奏請撥綠旗兵一百守營綠旗步兵二百家選兵二百於鄂爾坤地方自呼克新至濟爾瑪台擇水土佳處開墾試種小麥豌豆一年有效據實具奏王大臣等議覆行至是總理事務王大臣等言鄂爾坤地界寬廣可耕種若撥兵三千人各種二十五畝計可墾田七百五十頃慶復

所奏請於鄂爾坤附近屯田所見畧同請以原摺
付軍營將軍等按可墾之田詳悉定議從之至二
年額駙策凌等言鄂爾坤可耕地畝實可給三千
人耕種即以今年換班綠旗兵六百再另撥一千
九百共二千五百一千五百名擇地耕種令一千
名分駐塔密爾鄂爾坤兩處防守倉庫王大臣等
議覆據奏除駐防兵外常用一千五百人耕種今
軍營綠旗兵六百并罪人計一千有餘不必更撥

兵丁前往從之

二十年籌辦額爾齊斯等處屯田先是

諭軍機大臣從前因未深知達瓦齊情形原議四月進
兵故令於額爾齊斯派喀爾喀兵綠旗兵并策凌所
屬人等留駐屯田今進兵甚早而達瓦齊之力已窮
兵到即可成功其額爾齊斯仍需屯田與否應另行
酌辦如需屯田或即於策凌等遊牧所留人內派往
或凱旋後再將策凌等人衆派往著班第等詳議具

奏至是班第等言臣等接奉

諭旨公同商酌現在準噶爾窮蹙大兵一到自可迅奏
膚功而平定準噶爾後額爾齊斯地方亦必需駐
劄兵丁照管新收人衆其派出屯田兵丁并牛種
器械等物既俱齊備應仍照原議辦理奏入

諭軍機大臣據班第等奏額爾齊斯仍須屯田之處即
著照所請行其耕種所得穀石以備接濟往來兵丁
口糧亦屬有益若欲撫綏新收人衆於額爾齊斯駐

兵則大功告成後伊犁已留重兵兼有大臣駐劄額爾齊斯去阿勒台甚近又何必更設兵駐防著傳諭班第等知之二月班第等言本月十二日令屯田兵起程其管豁屯田兵有原派塔爾瑪善現在齊齊克淖爾居住屯田兵由彼經過即令前往額爾齊斯等處詢問可以屯田處即行耕種俟親王成衮扎布事畢往額爾齊斯公同商辦從之至是班第等言屯田之地已定在伊蘇圖鏗格爾等處應移

布拉罕兵一千名於鄂倫淖爾地方駐劄照管從之

二十一年

諭伊犁附近地方可否發綠旗兵前往屯田著兆惠等預為籌酌奏聞至是兆惠等言自巴里坤至濟爾瑪台濟木薩烏魯木齊羅克倫瑪納斯安濟海晶等處俱有地畝可資耕種伊犁附近地方約有萬人耕種地畝崆吉斯珠勒都斯等處可種之地亦多

但須預為籌辦方不悞來春耕種之期現在伊犁
有回人三十餘名擬酌增至百人再派綠旗兵一
百名酌帶籽種於明年正月內前來臣等按地分
給耕種試看一年再行辦理從之

又

諭軍機大臣伊犁等處可種之地既多酌量遣派內地
兵民前往耕種照西安地方之例辦理

二十二年復設塔里雅沁屯田陝甘總督黃廷桂

言塔里雅沁自乾隆七年停種之後渠道淤塞開挖修築在在須費人工現在派兵二百名乘時墾種止可種地一千五六百畝佈青稞一百五六十石餘地至明歲再行辦理一二年內自可次第修復奏入報可

又派兵吐魯番屯田成衮扎布等言吐魯番地方直通伊犁並與各處回城聲息相通應派兵屯種尚有闕展地方地勢寬展可資屯務即將臣等所

帶綠旗兵丁派令耕種奏入報可至是阿里衮
言吐爾番所種大小米自四月初九至二十三已
種小米二千三百四十餘畝再行接種大米又新
附回人留於吐魯番種地亦請給發籽種從之

又

諭軍機大臣兆惠等奏稱烏魯木齊地方可以耕種又
與吐魯番相近著黃廷桂於綠旗兵內多選善於耕
種之人發往烏魯木齊明春即令試種地畝量力授

田愈多愈善即遵諭速行仍將選派官兵人數及督率員弁指交地畝陸續奏聞

又

諭軍機大臣黃廷桂奏派兵一千名於來春往巴里坤等處屯田等語自應及時籌辦但此尚在近地其烏魯木齊等處亦須漸次屯種其如何相度水利測驗土脉及派兵前往預為料理之處著傳諭黃廷桂詳悉具奏先是黃廷桂言巴里坤尖山子起至奎素一

帶百餘里內地畝雍正年間俱經開墾舊迹具在
係取用南山之水共有正渠九道自山口以外多
滲入沙磧必須木槽接引方可暢流似宜早計請
於甘涼肅三處先派種地官兵一千名於來年正
月前往疏濬水泉開引渠道至二三月間土膏萌
動即分布各兵於可墾之地翻犁試種查巴里坤
氣寒霜早惟宜青稞應令各兵丁於青稞外如糜
穀之類少為試種倘或有收再行加增疏入遂有

是

諭

又

諭軍機大臣昨令黃廷桂查勘屯田處所廣為播種勿致荒閒添派兵丁以資耕作可傳諭兆惠富德等留心經畫務使地無遺利

二十三年派兵屯田哈喇沙爾等處增烏魯木齊等處屯兵先是二十二年成衮扎布等奏請來年

派兵二千自魯克沁起程前往哈喇沙爾等處耕種至是雅爾哈善言哈喇沙爾通庫車阿克蘇大路舊係厄魯特回人墾種約需兵二千名以上海都河水甚足烏魯木齊約需兵一千名水亦足用闢展魯克沁吐魯番除官兵及回人屯種外因水乏無可開墾吐魯番西百餘里通哈喇沙爾托克三城水頗充足可得兵丁五百名屯種之地臣等擬於哈喇沙爾派兵二千四百名烏魯木齊原派

兵五百增派五百名托克三與闡展魯克沁相近
量增兵五百名闡展仍派兵四百名共需兵三千
三百名攜帶牛具口糧前赴魯克沁於三月前趙
行從之

議增兵屯田哈喇沙爾托克三等處永貴等言烏
魯木齊等處現在屯田兵三千六百名其魯克沁
吐魯番附近哈喇和卓等處雖有餘地實為磽瘠
不必增兵烏魯木齊地廣而荒擬前往查勘再議

托克三餘地尚多水亦足用惟當修堤濬渠應請
增兵四百名哈喇沙爾地最廣海都河水甚足但
河身低於渠道須大加修築應請增兵二千名合
之現在兵丁共六千名疏入軍機大臣議如所請
得

旨允行

又

諭軍機大臣現在辦理回部未竣屯田伊犁可以暫緩

惟於烏魯木齊一帶及噶勒藏多爾濟遊牧之羅克倫等處亟宜相度地畝廣為屯種俟將來酌量情形由近及遠即一二年後亦無不可著傳諭黃廷桂及永貴定長等知之

侍郎永貴等奏報烏魯木齊等處屯田新舊開墾畝數永貴等言本年屯田地方闢展烏魯木齊已經墾種外據各該管官員報稱哈喇和卓墾地八千七百畝托克三墾地五千三百畝哈喇沙爾墾

地四千餘畝俱經種植臣等合併闢展所種一萬畝烏魯木齊所種八十畝共三萬六千八百餘畝較去年增墾七千三百餘畝所種禾苗先後長發臣等督率官兵盡力耕耘引水灌溉今秋可望豐收奏入報

聞至二十四年定長等奏報屯田本年增墾一萬零四百七十四畝因閏月增墾八千七百七十一畝計新舊地共種過五萬二千七百九十一畝

察勘穆壘至烏魯木齊可耕地畝先是黃廷桂言
由巴里坤至烏魯木齊南路一帶如闢展托克三
哈喇沙爾等處今歲俱已種植自烏魯木齊以內
察罕烏蘇穆壘北路一帶地方多係沙磧難於開
墾由穆壘至烏魯木齊一帶則可墾之地最多近
因哈薩克貿易遵

旨揀選副將一員管押貨物應請遴選道員同往於經
過之處將曾開墾地畝及氣候寒暄土脉肥瘠

水泉多寡繪圖貼說請

旨遵行從之至是努三奏言臣率道員薩瀚等勘得自
巴里坤至穆壘不堪屯種自穆壘至烏魯木齊有
噶勒藏多爾濟遊牧之昌吉羅克倫等處可耕地
畝十六處視其地土肥瘠水泉多寡以定耕作仍
令屯兵等輪替耕種以息地力方為有益計需兵
六千八百名謹繪圖恭呈

御覽奏入

諭軍機大臣據努三察勘穆壘至烏嚕木齊屯田約需
兵丁六千有奇繪圖呈覽此時雖距耕作之期尚早
自當先為籌畫可傳諭黃廷桂於內地綠旗兵丁內
挑選七千名調赴烏嚕木齊等處并傳諭永貴等知
之

議開昌吉羅克倫等處屯田努三等言臣等查勘
昌吉羅克倫等處昌吉距烏嚕木齊六十餘里羅
克倫距昌吉四十里舊係噶勒藏多爾濟遊牧地

平水足有河渠舊址修理亦易丈量得昌吉可墾
田八萬餘畝羅克倫可墾田七萬餘畝臣等會議
昌吉羅克倫各駐兵一千五百名更番開墾種植
以休地力奏入

諭軍機大臣努三前奏請查勘烏魯木齊屯田時朕即
謂雖為時尚早亦當先事籌辦隨諭黃廷桂來年穆
壘烏魯木齊屯田派兵七千名及辦給農工器具今
昌吉等處既可駐兵三千名傳諭黃廷桂照數添

派合之前派七千即得萬人為數雖多但屯兵惟取其習於耕作不必盡皆精壯黃廷桂宜酌量辦理仍與努三永貴等會同定議具奏

又

諭軍機大臣據黃廷桂奏稱塔里雅沁試種豌豆已有成效塔里雅沁既可種豆闡展吐魯番托克三烏魯木齊等處想皆可以試種若得成熟於牧養更為有益可傳諭永貴等將闡展等處節候地氣測驗確實

即於明春佈種

又

諭軍機大臣從前因辦理回部將伊犁屯田暫時停止
今回部迎降相繼大功計日可成則屯田自不可緩
軍營綠旗兵丁駐防各城所用無幾應行派往伊犁
并酌派回人令納穆扎爾等辦理屯田或將魯克沁
哈喇沙爾烏魯木齊等處屯田兵丁移至伊犁再於
內地派兵補缺可傳諭兆惠等將應辦之事先時預

備

二十四年定增兵屯田特訥格爾昌吉羅克倫等處陝甘總督楊應琚言特訥格爾昌吉羅克倫等處地氣和暖且與烏魯木齊相近增兵屯田實為善策查烏魯木齊現有屯田一千名擬於凱旋綠旗官兵內截留五千名以一千預備差遣以四千分墾地畝從之

又

諭軍機大臣定長等將本年開展托克三烏魯木齊哈喇沙爾喀喇和卓等處屯田收穫分數具奏又稱除烏魯木齊外其他地畝較之初種時漸覺歉薄等語此等地畝雖不能如內地人工糞治可以常年耕種但地頗寬敞彼此遞年互調耕作自有餘力著傳諭楊應琚會同舒赫德悉心講求酌議具奏

二十五年

命調巴里坤綠旗兵九百名赴烏魯木齊屯田

又

諭軍機大臣阿桂等奏稱伊犁河以南有地名海努克
與固勒扎相隔一日程途水土沃衍請於此處先行
屯種相其形勢分立村莊等語所辦甚是俱依議行
又

諭軍機大臣安泰等奏屯田以漸開擴直通伊犁自烏
魯木齊至羅克倫擇水土饒裕之地立四村莊每莊
屯兵八百餘名委遊擊等員督課耕種等語所見甚

是可即勉力善為經理

興舉伊犁屯田副都統伊柱言臣領屯田回人前來伊犁至海努克其地舊有廟宇又有築成營壘週圍俱可耕種即將官兵駐劄與屯田回人相隔二三里其應行安臺瞭望之處自東北塔前起至東南離本營五十里伊犁河南安臺五處其屯田回人三百餘名約相隔半里立一村莊共五十處各修緝溝渠引水灌田計所攜粟麥可播種全

完其回人所分各莊均有墻垣基址暫行搭蓋窩
舖俟農隙造房臣等駐劄處有廟宇二所大小住
房百餘間雖俱倒塌加以修葺尚可駐兵六七百
名奏入

諭軍機大臣伊柱奏稱屯田兵丁已抵伊犁之海努克
現在安設村堡修理溝渠等語看來伊犁屯田俱有
舊蹟著伊柱於一切應辦事宜先時相度加意奮勉
督策回人盡力耕耘勿為偷惰其地畝數目收穫情

形可遇便陸續奏聞至是參贊大臣舒赫德言伊犁屯田初次遣回人三百名小麥等未及播種來年自應多為遣往而海努克固勒扎兩處俱派官兵屯駐亦屬有益現派出回人五百戶於來年二月辦給籽種器具攜眷前往奏入報可

議辦伊犁屯田增兵築城事宜參贊大臣阿桂等言伊犁本年現有屯田回人三百名近經舒赫德增派五百名應再增派二百名俟伊犁麥熟後遣

發屯田綠旗兵一百名應增派九百名陸續遣發伊犁要地河北則固勒扎河南則海努克其地土肥饒之處則察罕烏蘇應於海努克築城以回人三百名屯田察罕烏蘇築城以綠旗兵一千名屯田固勒扎須築大城凡駐劄大臣公署倉庫咸在以為總匯奏入軍機大臣議如所請得

旨允行至是舒赫德言伊犁屯田回人一千戶除本年三百戶續派五百戶外餘二百戶今派出於麥熟

後送往奏入報可

又

諭軍機大臣海明等奏稱查閱喀什噶爾有索倫兵二百九十名察哈爾兵二百二十五名綠旗兵九百十名等語喀什噶爾現在有索倫察哈爾兵則綠旗兵可以調發今伊犁地廣而腴屯田兵丁頗覺不敷雖經派兵一千名陸續發往尚可再為增加著傳諭舒赫德來年遣辦屯田兵丁時即將喀什噶爾之綠旗

兵丁撤回由阿克蘇就便發往

准議叙管轄屯田官員并兵丁酌量獎賞定長等
言今歲闢展等處屯田收穫較上屆多一萬三千
餘斛請將管轄官員分別議叙兵丁酌量獎賞奏
入軍機大臣議如所請得

旨允行安泰等言烏魯木齊昌吉羅克倫五處村莊所
收青黍等穀共九萬四千八十九石有奇村莊地
畝肥磽不同而官兵等皆能盡力耕作應請照例

議叙從之

二十六年議開展等處餘地募回人承種軍機大臣議覆安泰等奏開展喀喇和卓托克三等處留屯兵六百名餘俱發往烏魯木齊陸續前往伊犁屯田其空出地畝係官為開墾所留兵丁既不敷耕作應召募回人承佃交納官糧請交與安泰等詳議具奏從之

議設瑪納斯等處屯田安泰等言瑪納斯庫爾喀

喇烏蘇晶河等處在伊犁烏嚕木齊之間地可屯
田應設立村堡三處以次經理來春先派兵五百
名往瑪納斯以一百名起蓋倉廩房舍四百名屯
田續派兵五百名往庫爾喀喇烏蘇即以瑪納斯
餘糧辦給其晶河亦照此續辦奏入軍機大臣議
如所請得

旨允行至是阿桂等言瑪納斯距昌吉羅克倫不遠酌
派屯田兵二百名庫爾喀喇烏蘇晶河距伊犁烏

魯木齊俱遠每村派兵三百名共八百名人各墾地十五畝奏入軍機大臣議如所請得

旨允行

又

諭軍機大臣安泰等奏烏魯木齊現在屯田五處所收穀石甚屬充裕查該處屯田有綠旗兵三千名請以二千差操一千屯田互相更換等語烏魯木齊收獲穀石雖盈餘甚多支用處少但僅以千人屯田官兵

已墾之地又必荒蕪甚屬可惜若不通融籌畫穀石
陳陳相因必致朽腐因思該處兵丁俱係三年一換
並未挈眷若聽兵丁等移家居住或內地遊民有願
往立業者著楊應琚查辦酌給田畝籽種安插似有
裨益著傳諭安泰等相度情形妥協酌議再著軍機
大臣議奏至是安泰等言烏魯木齊現駐兵丁臣等
詳加詢問俱願挈眷惟請於收獲後回籍遷移臣
等擬咨會楊應琚從安西等處按其程途遠近給

與車輛口糧於明年二三月前來再楊應琚有招
徠遊民之舉俟送到時酌給地畝口糧籽種照水
田例六年陞科但不便與兵丁雜居應令於臣等
駐劄相近之處安插從之楊應琚言肅州安西二
處招募貧民二百戶定於本年十月料理前往又
高臺縣招民五十六戶肅州招民四十四戶此外
河西一帶尚有數百戶情願挈眷前往又山西臨
晉縣民盧文忠一戶情願自備資斧前往頗知急

公仰懇賞給監生頂帶以示鼓勵其屯兵之願攜家口者現在續行辦送從之

參贊大臣阿桂等奏報伊犁二麥豐收之數阿桂等言伊犁屯田兵一千名除委派二百名外其餘八百名分作八屯每人種大小麥十畝新舊回人八百戶每戶給麥種一石茲於六月二十內外二麥皆熟兵丁所種約計二十分以上回人所種核算亦有二十分以上俟全行收穫及粟米收成時

再行請

旨加恩鼓勵奏入得

旨報可

又

諭成衮扎布籌辦科布多屯田成衮扎布言科布多屯
田應先派綠旗兵一百名官給籽糧農具俟收穫
後再將喀爾喀杜爾伯特扎哈沁人等派往奏入
軍機大臣議如所請得

旨允行

募民開墾巴里坤餘地楊應琚言巴里坤地土廣
衍水泉敷裕除屯兵所種地畝之外應出示曉諭
聽商民認墾按限陞科庶流寓貿遷之人皆樂業
安居漸成土著奏入得

旨甚好應廣為開墾楊應琚奏巴里坤招獲民人王王
美等六十七名認墾地三千七百餘畝二十七年
續招民人三十九戶認墾地一千四百五十餘畝

二十八年續招吳臣等三十名認墾地三千四百四十餘畝共八千二百餘畝皆係近水易於引灌之地俱照水田六年陞科二十九年續報商民三十名認墾地三千六百九十畝又續報敦煌等三縣招有情願赴巴里坤種地民一百八十餘戶

又

諭軍機大臣阿桂等奏稱伊犁屯田八千畝收穫大小麥糜粟青稞等穀共二萬七千一百石有奇約二十

分以上伊犁屯田回人八百戶收獲大小麥約二十
分以上糜粟青稞約四十分以上合算每人收穀四
十石應令其交米二十石定為成額則回人益知勤
動請嗣後人給籽種一石五斗以交糧十六石為率
所種四項穀石有豐歉不齊亦可通融抵補等語伊
犁屯田豐收皆官兵勤於力作所致自當加恩陞賞
所有屯田各官員俱交部議叙兵丁等酌量賞給以
示鼓勵回人等著與兵丁一體酌量賞給其定額交

糧之處俱如所請行至二十九年明瑞等言伊犁種地綠旗兵一千名新舊回人三十二戶所種地畝俱經成熟二麥青稞收成至二十分以上官兵等各知奮勉所收青稞視去歲較多麥子比去歲多至二千石以上回人所收亦與兵丁不相上下核計歲交可得四萬四千六百餘石查伊犁去歲所收較前歲豐裕蒙

恩將大小官員俱交部議叙兵丁人等賞給銀兩今歲

所收較去歲更覺豐裕相應請

旨照去年之例議叙賞給從之

二十七年

諭軍機大臣旌額理等奏稱發往烏魯木齊屯田遣犯
請先給屯田二十畝與兵丁一體計畝納糧伊等亦
有携眷者酌給地五畝自可開墾其未收獲以前官
為養贍家口等語著照所請行

又

諭軍機大臣旌額理等奏稱烏魯木齊辦給瑪納斯庫爾喀喇烏蘇晶河屯田兵丁馬匹糧餉俱全抵各該處現在水土滋潤三月前後可盡行播種等語此次派往兵丁衝寒行走奮勉可嘉著旌額理等酌量獎賞以示鼓勵

又

諭軍機大臣楊應琚請將闡展屯田收穫之芝麻菜子分給回人種植俟收穫後扣還籽種其餘糧為交官

以抵應輸額賦等語開展所種芝麻菜子上年已試有成效自應借給回人種植以省運油之費但回地向未有此恐非所素習著傳諭德爾格酌量辦理再烏魯木齊地畝廣遠現在開墾三屯或即於該處播種以濟日用亦無不可著傳諭楊應琚知之

安插添註伊犁屯田回人阿桂等言葉爾羌回人續請移居伊犁屯二百十四戶臣等量其年力精壯與從前移駐之一百十戶共為二百五十戶給

與籽種等項合經制屯田回人一千戶定為一千二百五十戶其老弱七十四戶交該伯克養贍年幼者俟其長成仍可補屯田之缺再此項回人若俱令在河北固勒扎等處屯田亦尚可容但不如河南居住百餘戶則兩岸俱有壯屯於觀瞻更協因於和濟格爾伯克編設一屯安插八十戶海努克編設一屯安插七十戶奏入報可

定各城回民納賦之制楊應琚等酌定新疆事宜

凡回民自種地畝視歲收糧數交納十分之一其
承種官地歲收糧石平分入官總計各城回民自
種地畝闢展歲納糧四千五百六十五石哈喇沙
爾納糧一千四百石庫車納糧九百六十石又另
納地租糧二十五石沙雅爾納糧五百六十石阿
克蘇納糧六千八百三十五石五斗賽里木納糧
九百七十五石拜城納糧五百二十石五斗又另
納糧三十石葉爾羌納糧二千八百帕特瑪

每
一
帕特

瑪合官斗納普爾錢四萬八千騰格每五十普爾為一騰格

二騰格合銀一兩所屬巴爾楚克納錢一千二百騰格克

扣爾巴特納糧九帕特瑪和闐納糧二千帕特瑪

納錢二萬四千騰格喀什噶爾納糧四千帕特瑪

納錢五萬二千騰格又納官借籽種另冊糧六百

九十二帕特瑪所屬伯得爾格納錢四百騰格英

阿桂爾納糧五百帕特瑪承種官地庫車歲收額

糧一千二百五十石沙雅爾三百七十五石阿克

蘇五十石葉爾羌一千二百二十一帕特瑪和闐
六百四十帕特瑪喀什噶爾三十二帕特瑪

侍郎旌額理等疏奏烏魯木齊安插民戶開墾地
畝成效旌額理言楊應琚招募民人四百餘戶陸
續送到臣等辦給農具口糧每戶給與十五畝籽
種衆民戶感戴

皇恩無分老少力勤耕作除十五畝籽種全行播種外
並欲竭其餘力再行開墾臣等復借給麥種三百

十餘石民人愈加奮勉每戶各開地三十餘畝悉
行耕種所種青稞粟米等苗甚屬暢茂豐收可必
奏入報可

二十八年議增兵屯田伊犁明瑞等言伊犁駐劄
涼州莊浪滿洲兵建造城署營房糧餉須多為籌
備請以來年為始先增屯田兵五百名乾隆乙酉
年城工事竣又增內地調往築城綠旗兵一千名
歸入屯田收穫糧餉自有盈餘從之

都統永貴等疏奏派往伊犁屯田回人額數永貴等言續派各城回人往伊犁屯田臣等於各城選擇約以一千五百名為率計將應派阿克蘇等處十二城回人彙齊查核已滿額數奏入報可

議科布多增派綠旗兵屯田成衮扎布言科布多地土頗肥但蒙古等未諳耕墾應請添派綠旗兵一百名軍機大臣議令烏里雅蘇台綠旗兵二百名內派撥一百名其額缺即以喀爾喀兵丁充補

從之

又設呼圖畢屯田旌額理言羅克倫以西地名呼圖畢田畝廣濶河水充裕東至寧邊城七十里西至瑪納斯一百三十里請將羅克倫換班兵丁六百名移於呼圖畢屯田從之

二十九年

諭伊犁將軍明瑞等移駐伊犁之涼州莊浪官兵錢糧毋庸拘泥內地成例並量給地畝學習耕種

議築城巴爾托輝安插伊犁屯田回人明瑞等言
臣等前將遷來伊犁回人三千二十戶派往各處
屯田惟令巴爾托輝築一小城仍以伊犁河北固
勒扎為總匯今據回人俱稱巴爾托輝地方泉甘
土肥情愿出力築大城移駐臣等詳勘地形如回
人所種之地稍遷迤西可空出摩該圖阿里瑪兩
處水泉為滿洲兵丁屯田之用請將伊犁河南海
努克之二百戶河北固勒扎一千九百戶內之八

百戶仍在原處駐劄其河南和濟格爾之三百戶
河北固勒扎之一千一百戶巴爾托輝之七百二
十戶俱令其駐劄巴爾托輝於今年屯田之暇先
造住房明年再行築城從之

又

諭軍機大臣據明瑞等奏稱於各回城再派回人二千
名赴伊犁屯田著照所請即行知各回城駐劄大臣
酌量派往惟擇其情願赴屯者不必勉強至三十年

明瑞言各城遷移屯田回人共一千七百九十六戶俱陸續到齊又據爾勒哈子伯克阿瑞稟稱從前塔里雅沁回人遷居伊犁其多倫回人甚為羨慕今現有三十戶情願自備資斧移來屯田臣等查伊犁地畝寬廣此三十戶回人既情願前往似應准其一體安插從之

又

諭軍機大臣楊應琚奏甘肅臯蘭等三十二州縣均有

被災之處已降旨賑恤並加恩蠲免額賦因念該處現在收成歉薄綠邊瘠土之民生計未免拮据年來新疆屯政屢豐如烏魯木齊等處糧儲甚為饒裕且其地泉甘土沃並無旱潦之虞如令該省接壤居民量其道里近便遷移新屯各處則內地資生既廣而邊陲曠土愈開實為一舉兩得著傳諭楊應琚令其悉心體察隨民情所願設法開導善為經理仍一面熟籌詳議奏聞至三十年楊應琚言烏魯木齊泉甘

土沃素為邊氓所慕上年欽奉

諭旨臣隨於肅州張掖敦煌等州縣招有七百戶於十月奏明辦送茲據肅州申稱招民八百餘戶高臺縣招民四百餘戶臣一面行文辦理糧務道員於呼圖畢寧邊城昌吉羅克倫等處查明餘地暨渠水情形可以安插照例給與車輛口食於八月內派員管送前往其來年應招戶民仍查明安插處所照例辦理奏入報可

三十年定屯田伊犁雅爾等處先是二十六年阿
桂言塔爾巴哈台地居厄魯特西北與俄羅斯哈
薩克相近應駐兵屯田擬於癸未年二月初從伊
犁派領隊大臣一員馬兵五百名屯田兵三百名
前往駐劄奉

旨俟伊犁積蓄充裕再行辦理至是參贊大臣綽克托
等言臣等於閏二月二十六日至塔爾巴哈台以
將軍明瑞所定屯田築城事宜逐一指出現領綠

旗兵六百名卽派五百四十名掘渠引泉開墾荒地月餘以來時雨敷降地畝俱已開墾次第播種青稞麥粟三月內築城照明瑞所定雅爾玉爾兩處所築城足敷兵丁一千五百名駐劄奏入報可
又

謝據明瑞等奏稱烏什事已完竣其烏魯木齊兵丁應先撤回飭令五福於八月二十一起程訖等語此辦甚非烏什事已告竣應將此項綠營兵留駐屯田

著寄信五福伊所帶撒邊兵丁此際若相距烏魯木
齊尚遠仍令前往烏什倘已近烏魯木齊暫回休歇
酌量不誤明歲烏什屯田於正月內帶領前往至十
月五福奏請於十二月二十間起程沿途將養兵
力計抵烏什即可補修溝渠開墾田地從之

議准添兵加墾巴里坤地畝楊應琚言巴里坤屯
田向止種有青稞一色邇年以來小麥豌豆俱獲
有收夏日炎熱之狀漸與腹地相近交秋仍暖霜

降較遲官田民田咸慶豐稔查該處可墾餘地尚
多應請即於明年就馬廠撥剩餘兵內酌撥一百
名加墾地畝疏入軍機大臣議如所請得

旨允行

又准募民屯田於穆壘楊應琚言新疆連歲豐收
甘省產米素少若以有餘濟不足惟有在附近內
地之處招民開墾將來產充糧裕商民稍有餘利
自必源源販運於內地民食大有裨益今查巴里

坤迤西之穆壘距巴里坤六百餘里直接烏魯木齊新屯之特訥格爾地方中間計有十餘處地土肥沃泉水暢流可墾地數十萬畝請就近於安西肅州等處招募無業貧民照例給與盤腳等項送至適中之穆壘地方先為安插耕種隨後廣為招徠逐漸接墾至烏魯木齊之特訥格爾並移設官兵駐劄疏入軍機大臣議如所請得

旨允行

三十一年總計綠營兵屯田伊犁四屯地三萬六千畝塔爾巴哈台一萬八千畝烏魯木齊三營五萬一千三百二十畝景化城一萬一千三百四十畝庫爾喀喇烏蘇四千畝晶河四千畝瑪納斯四千畝烏什一萬二千畝哈喇沙爾七千三十五畝巴里坤一萬六千五百畝穆壘四千畝哈密所屬材巴什呼四千六十五畝塔里雅沁七千三十畝招民承種地巴里坤四萬四千七百二十畝烏魯

木齊十萬三千八十八畝伊犁種地回民六千戶
歲交糧九萬六千石

三十三年

諭伊犁烏魯木齊等處種地兵丁收穫糧石已至應行
議叙賞賚分數經朕俱施恩將官員議叙兵丁獎賞
其烏魯木齊種地之民人及遣犯雖非屯田兵丁可
比該管官員並無分別理應一體議叙至種地之民
人遣犯等如果竭力耕種所收糧石至分數者亦應

於多收糧石內量加獎賞嗣後新疆各處種地民人
遺犯所收米石如及應賞分數俱照此辦理

三十六年戶部議陝甘總督文綬奏巴里坤墾不
成熟地畝六千三百畝准其照數豁除成熟有收
地八千四百九十畝應照例入額報部如議行

三十七年陝甘總督文綬奏新疆沃野綿延二萬
餘里屯田雖已廣闢而餘地尚多必須廣為招徠
使地無棄壤民無遺利因條具五事一招新疆商

賈傭工之人就近認墾以省資送一指明新疆地名道里情形曉諭戶民以期樂從一嘉峪關請每日辰開酉閉以便商民一烏魯木齊大路數丈請脩治寬濶以利行旅一安西溝渠應疏濬暢流以益灌溉皆為經久要務疏入奉

旨下大學士九卿集議施行

陝甘總督勒爾謹奏烏魯木齊撥入民籍之遣犯一百三十二戶並戶民馬成喜等墾種地畝俱扣

限六年期滿應准其一體陞科下部議行

先是烏魯木齊

於三十二年至三十七年所有戶民墾田一萬四千六百七十四畝已報部陞科至是復有此奏云

三十九年戶部議陝甘總督勒爾謹奏三十三年分巴里坤所屬奇台並東吉爾瑪等處報墾田地共九千一百二十畝今經六年期滿應准入額如議行

諭巴格奏巴里坤所屬濟布庫古城二處種地綠旗兵丁每人收穫細糧二十五石四斗有餘著照所奏官

員等交部議叙兵丁等賞賚

又

諭綽克托等奏烏什屯田兵丁本年屯田每人收穫細糧十九石以上慶桂等奏本年塔爾巴哈台屯田兵丁每人收穫細糧十九石以上著照所奏管理屯田官員議叙兵丁各賞給一月鹽菜銀兩

又

諭索諾木策凌等奏各營屯兵丁收成分數摺內稱濟

木薩營三十九年種地兵丁每年收穫細糧二十二石有奇與議叙賞給之例相符著照所奏行

四十年

諭伊勒圖奏塔爾巴哈台等處綠營屯田准各該處辦事大臣按照地方情形查覆請仿照伊犁烏魯木齊等處議定分數分別辦理其巴里坤哈密遣犯種地交糧應照該處兵丁一例勸懲等語著照所請塔爾巴哈台等處屯田收糧分數准其仿照伊犁烏魯木

齊勒懲之例分別辦理該部知道

戶部議陝甘總督勒爾謹奏巴里坤宜禾縣續招
戶民馮天貴等墾地三千畝准照例陞科如議行
諭勒爾謹奏本年巴里坤屯田兵丁及遣犯八百五十
名收穫小麥豌豆共合折細糧一萬二千八百餘石
均勻攤算每名收穫細糧一十五石零與議叙獎賞
之例相符等語管理巴里坤糧地官員著照例交部
議叙兵丁著賞給一月鹽菜銀兩遣犯著賞給一月

口糧

又

諭伊犁圖等奏本年伊犁屯田兵丁每人計收獲細糧
二十七石八升四合有餘應否將官員交部加倍議
叙兵丁賞給兩箇月鹽菜銀兩之處伊犁屯田兵丁
收獲細糧雖未及二十八石之數所欠不過數升著
照所奏行

又慶桂奏本年塔爾巴哈台地方屯田兵丁合計

每人各收穫細糧二十一石六斗有餘索諾木策
凌奏烏魯木齊所屬中左右濟木薩四營並瑪納
斯屯四十年分種地兵丁每石收穫細糧均在十
五石以上又右營並瑪納斯屯種地遣犯每名收
穫細糧均在六石六斗以上庫爾喀喇烏蘇晶河
二屯種地兵丁每名收穫細糧均在十九石以上
又該處遣犯每名收穫細糧七石二升有零綽克
托奏今歲烏什之屯田兵丁每人各收細糧十九

石以上均與議叙給賞之例相符奉

旨先行

四十一年軍機大臣議准將軍阿桂等會奏金川
地方設鎮安屯條款內令兵丁攜眷居屯查建昌
松潘維州等處兵丁男婦皆能習勤苦如有情願
攜眷者初至墾種於應得錢糧外給與鹽菜口糧
俟生計已成再行停止

永慶奏庫爾喀喇烏蘇晶河二屯每人收糧二十

石以上遣犯每人收七石六斗烏魯木齊所屬中
左濟木薩三營並瑪納斯屯種地兵丁每名收細
糧均在十五石以上中左二營並瑪納斯屯種地
遣犯每人收細糧均在六石六斗以上巴里坤種
地兵丁每人收十五石以上古城等營兵丁每人
收二十四石以上遣犯每人收十五石以上奉
旨官員議叙兵丁遣犯給賞

四十二年四川總督文綬等言各營綠旗兵攜眷

遠徙屯戍與西陲墾戶新地降番情事相等應使
眷屬均有所資合力耕作方於屯政有裨各按家
屬名口酌借口糧由屯員按月支放每日大口給
米八合三勺小口減半統俟墾種成熟收還報部
從之

諭索諾木策凌奏巴里坤種地兵丁每名收細糧十五
石以上古城穆壘種地兵丁每名收細糧十八石以
上並巴里坤種地遺犯每名獲細糧十五石以上官

員交部議叙兵丁賞一月鹽菜銀兩遣犯著分別賞給麪飭

四十三年戶部議准四川總督文綬等奏川省攜眷赴屯兵丁所種新疆地畝瘠薄若照烏魯木齊兵丁之例每人給地二十畝則收穫無多不足以供養贍應照戶民之例每戶給地三十畝至所需牛隻農具番地田土畸零並非阡陌毗連若按三名給農具一副馬二匹往來攜取實非所便且兵

眷皆能耕種全賴男婦同耕以冀有秋器具牲畜
實每戶所不能缺每地三十畝合給牛一隻並借
資口糧

四十四年兵部議科布多辦事大臣明善本年屯
田收穫糧石較每年甚為豐裕將綠營兵丁并蒙
古章京兵丁賞給段布銀兩應將科布多屯田官
員分別議叙

成都將軍特成額等言金川各屯地勢迥異西陲

眷兵種出之糧例應盡數交官但口外食物昂貴
兵丁月餉鹽糧不足養贍家口請將兵丁種地之額
參酌變通以本年為始每兵所撥三十畝地內以
二十畝收穫之糧全數交官其餘十畝所收糧石
即給兵眷為養贍於四十八年陞科納糧下部議
行

諭索諾木策凌奏瑪納斯左右兩營庫爾喀喇烏蘇晶
河並提標中左右濟木薩四營所管各屯種地兵丁

每名收細糧均在十五石以上古城穆壘營種地兵丁每名均收十八石以上又瑪納斯左右兩營提標中左右三營晶河屯種地遣犯每名均收六石六斗以上哈密協所營材巴什呼種地兵丁遣犯收糧在十八石以上官員議敘兵丁遣犯給賞

四十六年戶部議准成都將軍特成額等奏稱兩金川新疆辦理屯田原議駐兵六千名內以二千名種地每兵給牛一隻農具一副嗣於四十四年

裁兵二千名留實兵四千名以二兵合種地一分
仍需計用牛二千隻農具二千副至四十五年又
奏裁兵一千名止留額兵三千名除各官養廉及
公費空糧外止存實兵二千六百五十三名仍以
二兵合種一分止應給牛一千三百二十六隻五
分農具一千三百二十六副半應裁牛六百七十
三隻五分農具六百七十三副半農具口外無可
變價飭交各糧務收貯以備例給民戶應用牛隻

新疆稀少遇有倒斃各兵需自買補應將所裁牛隻給兵牧放分作五年扣價歸款以此牛供陸續補額之用其價每隻牽算銀十兩五錢三釐七毫零共裁牛六百七十三隻五分應繳銀七千七十四兩二錢四分二釐自四十五年起分作五年扣繳應造入各年奏銷新收項下報部查核

四十八年四川總督福康安等奏稱美諾等屯安插降番戎噶阿甲等一千四十三戶於四十一年

投誠次年耕墾扣至四十七年六年屆滿請自四
十八年起照漢牛降番之例徵收先是僨拉漢牛
降番二百九十二戶於三十八年投誠給地安插
早經墾熟於四十四年每戶徵納雜糧二斗一升
八勺五抄美諾即照此例以稞麥菽豆四色兼收
交各屯員照數徵收搭放官役口糧按年造報議
如所請奉

旨允行

五十年

命奎林將烏魯木齊吐魯番兩處應否加屯查明籌議
奎林奏從前設立屯田履畝確勘其磽瘠地畝及
灌溉不到處所均為斟酌挑棄今烏魯木齊所欲
加之屯仍係從前挑棄之地是與巴里坤所報帶
補霜災地畝無異且迪化州每歲所需糧共七萬
一千餘石除官屯戶民歲收糧二萬四千餘石外
尚需撥運糧四萬七千餘石今欲加屯即使不致

歉收亦僅得糧九千餘石仍須撥運糧三萬八千
餘石是徒費周章終不能如數備供實屬無益但
查向來一切輓運俱係雇用馬車每車百里需腳價
銀一兩二錢其餉鞘茶封等項原係急需隨到隨
送至輓運兵糧於一年前預行估定數目儘可從
客運送且烏魯木齊民間所用牛車每農隙時希
冀餘利受人雇覓亦可載糧四石每車百里需雇
價銀九錢較省腳費可永遠遵行吐魯耆糧價較

各屬昂貴暫停採買必至平賤至烏魯木齊應行
清丈民田務令徹底清釐不能不有需時日約計
丈量完竣分晰造冊需至臘底於明歲春間再行
親身抽丈務使已墾地畝不至隱匿奉

旨如所議行

皇朝文獻通考卷十一